



Senin, 17 April 2023

Ogen : 2 Kronika 15: 7



Lit upah



Asa e me kempu Rehabeam, anak Salomo. Ia raja si erbahan sada reformasi agama kenca bapana ras ninina nembah berhala. Iambekkenna kerina berhala-berhala ras ipajekenna mulihi batar-batar Rumah Pertoton janah ia pe erkemalangen man Tuhan. Ulihna negerina sedekah 35 tahun lit I bas dame, la lit perang i je. E me upah si ibereken Dibata man Asa, bas ia la ngusih perbahanen nini ras bapana.

Kerina sinilakoken kita enda lit ulihna. Apakah ulihna mehuli ntah la mehuli tergantung arah kai siilakoken kita enda mehuli ntah lang. Raja Asa nggo ngelakoken si mehuli, arah usaha ras perjuangenna guna ngelawan warisen keluarga eme penembahen berhala, tapi Asa pe ngelakoken si la mehuli ka nge kenca ia nggo ndekah jadi raja, eme 1. Ia ngadi erpesukuten man Dibata janah mengandalken gegeh manusia. 2. Itulakna pesuruh Dibata ras ibunuhna. Sada tanda kemerosotan kiniteken ibas ia nulak nabi si maba persinget ibas Dibata nari guna kiniulin geluh. 3. Asum Asa erbebe erkiteken sakit, labo ia ndarami Dibata guna pepalem ia tapi idaramina penampat man guru-guru. Upahna eme mate. I bas pudi metua, Asa lanai ncikep kinitekenna man Dibata. Mbue ialokenna tanda sengget i bas Dibata tapi sie la erguna adi la kin kinitekenna paguh man Dibata. Sabap adi la kin ibangun hubungan si intim ras Dibata, tek ras erpengendes man baNa, maka kegeluhen pertendinta pe banci reh urakna.

Sadar kita maka tep-tep ujian lit konsekunsi si sepadan. Asum ngelewati ujian e, kiniteken turah ras Dibata masu-masu kita. Asum gagal ngelewati ujian e, kiniteken pe layu janah hubungenta ras Dibata pe terkena dampakna.